



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

Modi aser Xi nati India-China ken o bentettetsü: Putin

Wimbledon nung Wawrinka masayatsü



VOL. XVIII NO. 2332 (ADOK 232) DIMAPUR AMUNGNÜ (SUNDAY) AAMI (JUNE) 06, 2021 ₹ 5.00

Nagaland Police-i World Environment Day 2021 among



Nagaland Chief Minister Neiphiu Rio-i New DC office complex, Dimapur nung World Environment Day tenüing nung süngdong ka atema angur. Noksa nungsa Dimapur Deputy Commissioner Rajesh Soundararajan aser DGP Nagaland T. John Longkumer na angur. (Dimapur, June 5)

Dimapur, June 5, 2021 (TYO): Nagaland Police-i Department of Environment, Forests and Climate Change, Nagaland den külemi New DC Complex, Chumukedima nung World Environment Day 2021 mongogo. Parnoki "Ecosystem Restoration" omen nung ajemdaker iba tesem nung süngdongtem atem. World Environment Day ya kümshia June 5 nung amonger. Sentong nung Nagaland Chief Minister Neiphiu Rio aden aser pai DGP Nagaland T. John Longkumer den külemi DC Complex, Chumukedima nung süngdong ka atem. "World Environment Day tenüing nung DC Complex Chumukedima nung süngdong ka temogo" ta tanü CM Rio-i Twitter

nung metetdaksü. "Asenoki alima den tesentaktep tajung yanglutsüla aser ibaji asen kidang nungi tenzüksüla" ta paisa ashi. Iba sentong nung CM aser DGP Nagaland nati anir Commissioner of Police Dimapur, Deputy Commissioner Dimapur, DIG (Trg) & Camp Commander Chumukedima aser tongti Police ketdangsurtemi süngdong atem. Sentong nungsa DGP Nagaland T. John Longkumer-i Chief Minister Neiphiu Rio nem Photo Album ka agütsü. Iba nung 15 Armed Battalions, 12 District Executive Forces, 2 Training Institutes aser Nagaland Police indang Establishments/Units-i state ajungalen Plantation Drive agiba enoka lir.

Peren nung loktitentetemi ozüing alema arurtem meindoktsü akhanger

Peren, June 5, 2021 (Agencies): Peren district nung Civil Society teloktemi Deputy Commissioner dang Lamhai li nung ozüing alema arua alirtem meindoktsü takhangba agütsüshio. "Lamhai nunger ali nung ozüing alema arua yim akümer-Khehoi (Kiyevi-B), Phushito, Vihuto, Jacob Zhimomi Village, Officers' Village, Hetoi aser Kiyevi village agientsüla, kechiyong ali kiburi April 5, 2021 nü temelaba agütsüba meyipa agiogo," ta Zeliangrong Baudi (N), Nagaland Zeliang People's Organization (NZPO) aser Lamhai Village Council (LVC)-i Peren DC dang shidi ka nung ashi. Tesüiba mapang state sorkar nem iba indang osang aiben agütsüogo aser United Zeliangrong Youth Front-ia anogo 30 züingzüksüba June 12,

2021 nü tembangtsü, ta parnokisa ashi. "March 22, 2021 nü Lamhainamdi nung tai maketba nisung asem tepsetba sülen ali atsünga agiba atema inyaksü melena, state sorkari iba tesem nung ali atuba osettem bener arua inyaksü, electrical power connection, water supply aser ki aika yanglutsü melar" ta parnokisa ashi. Ozüing alema arurtemi parnok inyaknuba inyaksü melar aser sepaitem mapa lemzüksüogo. Iba denji külemi lanur aika binocular amer lir aser drone flying surveillance inyaker, ta CSOs-i shidi nung ashi. Külen, Lamhainamdi nungertembo pei li nung süng abenia moudaktsüi noktanger. Anungji Lamhai nunger li nung ozüing alema arua alirtema kasa noktangtsü akhanger" ta parnokisa Peren DC dang ashi.

HFW-i COVID-19 atema Rs 78.37 crore endok; BSL lab yangluba nung Rs 1 crore shi meputep

Kohima, June 5, 2021 (TYO): Nagaland nung COVID-19 wara agi kongshiba sülen Health & Family Welfare (HFW) Department-i Rs 78.37 Crore tashi endokogo. "COVID-19 azüoktsü aser iba dak sendakba nung Rs 78,37,41,614 endokogo. Iba nung Biosafety Laboratory yangluba, Quarantine Centre lapokba aser vaccine agütsüba dena lir" ta HFW Principal Director, Dr Neikhrielie Khimiao-i ashi.

Honibarnü HFW ketdangsurtemi 2019-20 aser 2020-21 nung COVID-19 atema sen amshiba osang metetdaksü. "2019-20 financial year nung Directorate of HFW-i Rs 76,50,01,019 aser 2021-22 nung Rs 26,45,44,158 angu. Department keti Rs 102,95,45,177 aruba nung sorkar, North Eastern Council, grants-in-aid aser tenla agütsübatem dena lir," ta Dr Khimiao-i ashi. **Contingency fund nungi Rs 21,12,50,602 endokba:** * District balala nem COVID-19 atema sen agütsüba: Rs

5,23,07,630
* Meriema Quarantine Centre: Rs 23,44,937
* ATI Quarantine Centre: Rs 1,73,600
* K Badze Quarantine Centre: Rs 34,16,000
* BSL-3 Kohima: Rs 8,78,78,589
* BSL-2 CIHSR Dimapur: Rs 3,72,35,164
* BSL-2 Tuensang: Rs 2,96,24,553
Hokolbarnü Directorate nung osangbener senden nung osang agütsüba dang nungi tanü metetdaksüba nung Rs 1,07,29,871 timba lir. Yashi SNO IDSP Dr Nyanthung Kikon-i BSL-3 Kohima yangluba nung Rs 8,66,44,018, BSL-2 CIHSR Dimapur nung Rs 3,69,81,164 aser BSL-2 Tuensang nung and Rs 2,03,83,253 endok ta shia liasü. Maneni, osettsüset aser mozü nung Rs 44,88,84,967 endok, ta Dr Khimiao-i tanü ashi. March 13 nungi August 7, 2020 tashi IEC & HFW Directorate Operation Cost nung Rs 2,50,22,082 endok.

Iba nung NHAK nung earthing enokba nung Rs 1 lakh endokba dena lir. MS Dimapur nung civil works atema Rs 70,38,402, ta Dr Khimiao-is ashi. Department-i Rs 4,26,62,630 tashi Hotel Bills agütsüba. Ibaji East Gate Hotel (Rs 9,17,386), Hotel Pine (Rs 9,35,810), Hotel Millennium Rs 4,64,138), 2K (Rs 10,45,000), aser Health Workers atema Quarantine Centre ama amshiba Jubilee Memorial Hall, Ao Baptist Church Kohima (Rs 2,15,000). Directorate of HFW-i sen endokba osang metetdaksüba nung hotel tenüingtem magütsüi hotels bills ta ser dang Rs 3,90,85,296 endokba shia lir. October 23, 2020 nungi February 8, 2021 tashi district balala nem CMOs aser MS nem Diet Bills atema Rs 80,68,876 agütsü aser vaccine aliba nung Rs 2,94,17,850 endok ta Directorate of HFW-isa metetdaksüogo. "May nungi October 2020 tashi MO tem nem itasen agütsüba nung Rs 84,05,834 endok" ta Dr Khimiao-isa ashi.

COVID-19 Nagaland: Nisung 309 dak putet; 6 asü

Kohima, June 5, 2021 (TYO): Honibarnü Nagaland nung nisung 309 dak COVID-19 putet aser parnok züingsema nisung ajak agi 22,696 kümogo. "Tanü nisung 309 dak COVID-19 aliba putet. Parnokji Mokokchung nung 164, Kohima nung 55, Dimapur nung 33, Mon nung 29, Tuensang nung 15, Longleng nung 7, Kiphire nung 4 aser Peren o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi. "Maneni, tanü COVID-19 puteta alir nisung 177 taneptsü angu. Parnokji Dimapur nung 87, Tuensang nung 37, Phek nung 19, Kohima nung 14, Mokokchung nung 11, Wokha nung 5 aser Mon nung 4 lir" ta paisa ashi. Tanü taneptsü angurtem

züingsema nisung ajak agi 16,814 kümogo aser Nagaland nung COVID-19 nungi taneptsü angurji 74.08% lir. Tang nisung 4,819 anepaludar, ta Dr Kikon-isa metetdaksü. "Tang anepalurtem rongnung nisung 208 dak shirangba yimya terara lir, 73 tera shiranga oxygen agir, 28 kanga shiranga oxygen agir, 19 kanga shiranga ventilator medeni ICU nung aser 9 ventilator nung lir. Nisung 4,482 dakbo shirangba yimya kecha mali" ta paisa ashi. Honibarnü COVID-19 puteta alir nisung 6 asü. Parnokji Dimapur o Mokokchung nung anana aser Kohima o Zunheboto nung kaka liasü. Tanü asürtem züingsema tasür ajak agi 422 kümogo saka nisung 14 bo tanga tashidak ajanga asü, ta Dr Kikon-isa ashi. Nagaland nung COVID-19

alitsü ta temolung melemi bilemba sample 1,98,514 tendangogo. RT-PCR ajanga 91,610, TrueNat ajanga 56,736 aser Rapid Antigen Test ajanga 50,168 tendang. "Hokolbar tashi nung Nagaland nung nisung 2,33,424 nem COVID-19 vaccine indang dose 2,87,658 agütsüogo" ta State Immunization Officer, Dr Ritu Thurr-ia metetdaksü. Vaccine agirtemji frontline workers 58,846, healthcare workers 15,596, arishi küm 45 ser temapur 1,24,006 aser arishi küm 18 nungi 44 tsüingda alir 34,976 lir, ta paisa ashi. "Nisung 54,234-i vaccine indang dose anaprong agiogo. Parnokji frontline workers 28,025, healthcare workers 10,199 aser arishi küm 45 ser temapur 16,010 lir" ta Dr Thurr-isa metetdaksü.

Covid-19 tashidak nokdangtsü atema senso shia teinyaktsü asem :

Tangar alidak teti teni tebang nembanga mask temerük agiang;

Tangar den tsüktepa tenokdak aser temen;

Teti sapon agi teka metsükang.

MKT-i State nung aliba tongtibang lenirtem nüngtem süngdong kaka temtsü



Mokokchung, June 05 (TYO): Mongsenyimti Student's Union (MKT)-i June 5, 2021 nü `ecosystem restoration` omen nung ajemdaker amungba World Environment Day nüngtem yimtsüng telungtet nung süngdong atemba sentong ka agia liasü. Sentong nung Sentitola, IFS Divisional Forest Officer, Mokokchung-i okila jembi aser MKT tir Putiwapong Ozukum-i sentong ratet metetdaksüba den L. Yanger Pongen Pastor MBA ajanga sentong moaja sarasadem agi.

MKT tir-i sentong ratet ashidang, kechiba nüngtem

süngdong jatsür atemer tasüra asenok nisungerji langka tajung inyakteta aliba nungji tama teka yia raksatsüsü meranger saka kodang nüngtem tenüing jatsür temdir na mesüra ni ajanga iba süngdong nungji mashi kongshia raksatsüra nüngja agütsür alisang dakji asenoki tarak kettsür aser alima tzümpung wazüka ayuba nung shilem agir ka masü akümer ta biletetdaksütsüba nüklä yur iba inyakyim tenzüka aor ta ashi.

Taküm iba lipkhukum anogo nung kaketshirtemi asen state kübok tokolak menden bena alirtem tenüing kar amshia Mongsenyimti yimtsüng littsü

nung kongshia aliba National Highway temeket nung nüngtem süngdong ka-ka temtsüogo. Item nüngtem süngdong temtsürtemji "We Care for Greener Tomorrow" ta nüngjaloktsür state Governor, chief minister-i anir cabinet minister-tem ajak, state level officer-tem, Langpangkong Tzükong nung elected member-tem, District level officer-tem, tongtibang Civil Society Organization nung President-tem aser ABAM executive secretary ta nisung 40 dak tali shimteta süngdong ka-ka temtsüogo.

(Maneni tapak 3 nung...)

Team Dimapur aser NCD-i naro apongba süngdong temtsü

Dimapur, Aami/June 5 (TYO): World Environment Day nüngdem nung Nodal officer Dimapur, Y. Kikheto Sema, IAS-i anir Team Dimapur aser Naga Council Dimapur interim tir Etsungmomo Kikon-i anir züingsem kar aser ADC Dimapur nungeri Naga Cemetery Dimapur tasenba nung naro apongba süngdong 200 dak tema temtsüogo.

Maneni tarutsü anogotem nung NCD aser volunteer temi leper matong tsüingda lenmang nung süngdong 300 dak tema atemtsü sentong lir.

Sentong nung o tatsüka jembiba mapang Kikheto Sema-i, Dimapur nung Naga cemetery tasenba ya Nagaland nung lepertem rongnung tongtibangtiba lir, kechiyong Covid den raratem timba iba leper nung rema lir ta ashi. Covid wara pokteter mezüingbuba aser tanabuba wave nung asürtem tanü tashi nung iba leper nung nisung 147 rema lir, ta pai ashi. Paisa, iba leper mezüing semdangba mapang JCB-i ongken mashi

mashi atuba ajanga tasümgangtem tatongi mesüi aremba biletetshia jembia. Ajsüüaka, pai Covid den raratem kang junga remtsüsü atema Lotha Baptist Church aser Lotha Youth Organization Dimapur-i readymade concrete grave pits yanglutsüsü atema teyari agütsüba atema parnok dang kanga pelaba lemsatöp.

Paisa, NCD aser Lotha Youth Organization Dimapur-i, corona agi asürtem rema aliba tesem karbo jangjatetba atema parnok dang kanga pelaba lemsatöp, saka ano nisung 50 dak tema mejangjateti aliba atema sasaa bilemba lemsatöpba den asür kinungrtem dang pei kinungertem jangjatsüsü mepeshia metetdaksüogo, ajita asünungdang parnok tenüingtem züingoksemteptsü.

Kasa mapang nung Kikheto-i, NCD dang corona agi asür kinungertem dang sen memeshitsü mepeshi, kechiyong nisungtem aikati tenla agütsüsü mulunga lir ta ashi. Paisa, Team Dimapur-i tenüingdaktatem agütsütettsü, ta ashi.

Maneni pai, süngdong

agütsüba atema Horti aser Forest department dang kanga pelaba lemsatöp aser parnok dang tarutsü nunga süngdonglitong anepalutsü atema NCD den yaritepa inyaktüsü mepeshi. Leper nung süngdong tema iba tesem tebor junga yanglushiba den aküm agütsüba ajanga leper semdangertem atema iba tesem ya "taküm aser tesangwa" tesem ka asütsü imlaba lemsatöp.

Leperi aoba lenmang tamajungba küma aoba indang NCD Interim tir-i lemsatöpba dak sendakba nung Sema-i, iba ken o ya temba jenjang nung aliba ketdangsrtem nem metetdaksüogo aser parnoki iba ken o tongtibang süa agütsü imlaba lemsatöp.

NCD interim tir-i Team Dimapur aser talisa Y.Kikheto dang, district nung wara den raraba mapang parnoki tongpu apur inyakba atema aser leper aiben semdanga shisatsü tajung agütsüba atema kanga pelaba lemsatöp.

Iba sentong nung Associate Pastor LBCD, Yanbemo Lotha-i sarasadema liasü.

Japukong Youth Organisation-i front line workers dang pelar



Dimapur, June 5, 2021 (TYO): Japukong Youth Organisation (J.Y.O)-i parnok telongtet nung front line workers dang pelaba metetdakja June 4 & 5 anogotem

tesem kar sema senzüogo. JYO teshimtet teloki E.A.C. H.q. Longchem, PHC Longchem, Police station Longchem, Police outpost Saring,

CHC, Mangkolemba aser Police check post Mangkolemba semdanga liasü.

Iba mapang JYO-i frontline workers nem tenüingsang agütsü aser chiyungtsü agütsü. Parnokisa doctor & staff aser Longchem nung EAC o OC nunger den ajurutepa pelaba metetdaksü aser akokba tashi yariteptsü molunga lir ta metetdaksü.

Minister Tenjen Inna Along-i yimtsüing nem medical supplies, sub centres aser P.H.C nem medical kits agütsüba aser ano Covid agi shiranger nem ambulance service angati agütsüba atema pelar ta JYO-isa metetdaksü.

"Iba mapa nung temeimertemi yaritepba atema pelaba metetdaksür" ta JYO-isa ashi.

NDPP Mokokchung-i Sharingain nem tenüingsang agütsü

Dimapur, Aami/June 5 (TYO): Nationalist Democratic Progressive Party (NDPP) Mokokchung Region-i sangdong ka ajanga, Speaker Nagaland Legislative Assembly aser taoba District Planning and Development Board (DPDB) Mokokchung mendenbuba Sharingain Longkümer-i achaayanga terenlok maparen balala inyakba atema kanga pelaba lemsatöpogo.

Tayari balala agütsübatem rongnung:

1. Lokti balala ben teyari agütsüba:-
 - (1) Gorkha Union Community hall.
 - (2) Tongdentsüyong ward nung MMC-i tetsüing lenmang aser railing yangluba nung teyari.
 - (3) Fazl Ali College Library ajungketba.
 - (4) D B Tribal Court yanglushiba.
 - (5) Sangtemla, Chungtia, Asangma Community hall yanglushiba.
 - (6) MDFA Coaching Clinic.
 - (7) DB Court-cum-Community hall Changtongya
2. IMDH Mokokchung nung Water boring & Filter.
3. Leperi aoba lenmang Soiling/Metalling/Carpeting .
4. Leper anepalusanger ki aser kima yanglushiba.

5. MMC jana bendendak tesemi aoba lenmang Soiling & metalling.
6. ADC Planning Conference hall Upgradation & Modernization.
7. MTBA Community kitchen nem jang juli 50 tenla agütsüba.
8. Tanga tesem nungi arurtem dak tashidak tendangtsü atema testing cartridges alizükba nung teyari agütsüba (Covid dak sendakba).
9. Sangtemla water reservoir nungi IMDH nem tzü agütsüba nung teyari.
10. IMDH nung dialysis machine 4 amenokba aser inyaksangshi nung teyari.
11. Metsüben approach road nung Safety crash barrier railing inoktsüba.

Maneni NDPP-i, pa mapang nung mapa tajung inyaka toktsüba ajanga Mokokchung nung aliba nüburtem ajangzüksü aser lanurtem ajungmesotsü ta ashi.

Kasa mapang nung DPDB Mokokchung mendenbuba asütsü atema Minister Tongpang Ozüküm shimba, kanga pelashishia agizükba aser lenir tasen kübok district maneni tejakleni renloka aotsü imlaa aser sarasadema ataba, NDPP Mokokchung Region tir N.

Bendang Jamir-i sangdong ka ajanga lemsatöp.

SEWA Nagaland-i merekmeju sentong ayongzüka agi



Kohima, Aami/June 5 (TYO): Self Employed Women Association, SEWA Nagaland-i ayongzüka June 5 nü World Environment Day nüngtem nung Kohima, Dimapur, Tuensang aser Phek district tem nung merekmeju sentong ka ayongzüka agiogo. Iba telok nung lendi nung yokyatsüyartem aser anogoshia ayangertem densema lir.

State yimtiba Kohima nung, self-employed tetsürtem pei aliba kiyong apir telok balala lemdang aser parnoki lenmang tezülen merektetba den PHQ junction, Main Town aser High School junction nung jana bendendak merektetja liasü. Kohima Municipal Council-i, SEWA volunteers temi bendenba jana bener aotsü atema gari agüja laisü.



Zapami Village Council aser Village Development Board-i, alima ajunga nung World Environment Day amungba anogo Phek district kübok Zapami yimtsüing nung alirtem nem Persimmon süngdong lemtsüogo.

Internet shitak manguba ajanga kaketshirtem tenem kolak nungi tatidang agütsür



Aizawl, June 5, 2021 (Agencies): Mizoram nung Young Mizo Association (YMA)-i anir kaketshir aser tanga lokti tentetemi kaketshirtem yaritsü atema tenem kolak nung ki sütsüogo.

Yimtsüngtem nung aliba kaketshirtemi internet timtem ajuruba atema parnoki iba mapa inyak.

"Mizoram University (MZU)-i June 1 nungi undergraduate students atema even-semester examinations tenzükogo. Covid-19 wara ajanga tatidangji online ajanga agir aser kaketshir 24,000 shi kati agütsüdar" ta MZU controller of examinations Prof. Lalnuntluanga-i ashi.

"MZU-i Covid wara mapang tang agi tasembenbuba atema online examinations acha-ayanga agir. State kübok tesem aika nung internet connectivity mejungi liaka online mode nung agütsüsa akümer" ta paisa ashi.

State kübok tesem balala nung BSNL, Airtel, Reliance Jio aser Vodafone-Idea ama internet service provider temi mobile towers yanglua lir saka tenem aika aliba ajanga jilatem nunga internet connectivity majung lir.

Iba denji yim aika nung mobile network metongjem lir.

Iba jagi Tlabung jila nung

YMA kongsangi tenem ka nung khen atema ki ka yanglutsü aser iba nungi kaketshirtemi online tatidang agütsür. Lunglei district kübok iba tesem ya Bangladesh den arrtsüa lir.

Siaha district kübok Mawhrei yim nunga kaketshirtemi arem nung kilometer 2 shi orr Tlao-tla hilltop nung jen ka nung tatidang agütsür, kechiyong idakji dang internet angur.

Iba jeni Mara kin nungi Mara Students' Organisation (MSO)-i yangluba lir.

Yimtsüng balala nungi undergraduate students 23-i even-semester examinations agütsür ta MSO general secretary Judson KT Zephatha-i ashi.

Iba yimtsüng nung mobile tower mali aser 2G internet facility junga mangur, ta paisa ashi.

Onoki Siaha district nung mobile network tajungba kümdaktsütsü atema state sorkar aser internet service providers dangi aiben mepishiogo saka mapa meinyaker. Iba jagi yakumbo onoki BSNL dena telecom company tem shibangtsütsü lungkak aita liasü, ta Zephatha-isa metetdaksü.

Aizawl nungi kilometer 250 shi pilar Tlabung jila nunga YMA indang Zodin kongsangi kaketshirtem tatidang agütsütsü

atema ki ka yangluja lir.

Iba jila nung internet service provider 3 lir saka internet facility kanga majung, ta kaketshir lennir Vanlalhratpuia-i ashi.

Lawngtlai district nunga Lai Students' Association (LSA)-i tatidang metenzükang internet service providers ketdangpurtem den ajurutepa senden amen aser iba sülenji internet connectivity tajungba kümogo ta LSA president F. Vanlalruatpuia-ia ashi.

"State sorkari state nung internet connectivity tajungba akümtsü atema inyaka arur aser iba mapa atema task force ka tentetogo" ta Information & Communication Technology minister, Robert Romawia Royte-ia metetdaksü.

Internet aser mobile service ya Centre sorkar indang teinyaktsü lir aser state sorkar indang shilem mali, ta paisa ashi.

Mizoram nung sorkari lockdown oziung agütsüba nung intra-state mesüra inter-district senzüsönong asütsü memelar, saka online examinations agütsüba kaketshirtem senzütsü melar.

Mizoram University (MZU) kübok affiliated colleges 28 aser constituent college ka (Pachhunga University College) lir. Tang agiba tatidang ya June 28, 2021 nü tembangtsü.

MKT-i State nung aliba tongtibang ... (TAPAK 2 NUNGI...)

Sentong nung okila jembidang Sentitola DFO-i, June 5 nü lipkhukum anogo amungtsü ratetba nukjidongji asen aliba libajen wazüka ayutsü asoshi terajem shisa, wainshin tasen ka adokdaktsütsü aser kechi inyaktsü nungdaker iba indang khuret metetdaksütsü asoshi amunger ta ashi. Kibur ka ama, asen teinyaktsü wadang asoshi asadangtsü, seret odangtsü aser aseni nangzükba jenjang tali tashi itshitsü anogoji tanü ya lir. Anungji, iba anogo nung libajen tebilemstü onük talisa tzümpung tatsükba akümba, tzü nung aliba shirurtem

lendonng tia-i ayiba, meimchir nütünyongtsük tali zünba, arem shiruru wazüka ayuba aser mesamadaktsü wazüka amshitsü onüktem tsütsü tebilemstütsü inyaker. Item osang ayimsünga prokshiba ajanga liphukum anogo ya alima kintem asoshi nübur rangben tongjema inyakba alima sabang ka kümogo ta ashi.

Laisa, 1972 küm nungi iba anogomung amungtsü tenzükba sülen nungi meimchir inyaktsü aser libajen onüktem nung rongdaksüa, asadanga, inyaktsü aser shisa taroktiba agi sensaksemteba amunger ta

ashi.

Alima yimayimko melenshiba aser meimchir aser taküm aliba shiruru ajak asoshi asangsang tia ngua angatetba ajanga tanü alima kintemi "kü lima kü teinyaktsü" yimyim ayimsünga ayimtener. Süngdong tsünüba sentong tilaka apiteta inyakba ajanga asen tetsü lima asentenshitsu aser kümzüka ayuba sabang nung asena atongsemer ta laisa ashi. Sentitola-isa, shilem agirtem ajak dang sapisayang sentongtem atongtsü aser rongdaksüa temulungjang taroktiba nungi ochishia inyaktsü mepishia liasü.

Piles Cure Centre - Kabiraj dang alakteta pelaba metetdaksü. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **H. Umar Chesam contact no.8416087414 / 7627998690** Address: **Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. Time: **7 AM - 3 PM** -Yours sincerely -Waichiba, Add: **4th Mile**



AGMC nung Covid puteta aliba tetsü 225-i tanur aso

Agartala, June 5, 2021 (Agencies): Covid-19 wara tanabuba agi kongshiba aliba mapang Agartala Government Medical College (AGMC) nung Covid-19 puteta aliba tetsü 225-i tanur sogo.

Tetsü dak COVID-19 liaka kinü tanurtem dakbo virus maliasü.

Yaküm Covid mezüngbuba wara nunga COVID-19 keta aliba tetsü 198-i tanur ao aser parnok 60 tashi cesarean asü.

"COVID-19 aliba tetsü 225-i tanur sogo aser kinü tanur ka dang danga virus aliba meputet. Doctor aser healthcare staff-i kanga junga anepaluba ajanga iba ya atalok" ta AGMC nung Obstetrics & Gynaecology Head of the Department, Dr. Jayanta Ray-i ashi.

"Mashisa tetsü kaji tajungtiba nung anepalutsüla aser wara mapang iba mapa inyaktsüba nung tayongzükba kanga nguogo. Saka ozi doctor tem aser tanga healthcare staff-i tetsütem aser tanurtem lendong nungi jenbua lidaktsütsü atema akokba tashi meranga inyakogo" ta paisa ashi.

Parnok anepaluba doctor aser healthcare staff karbo virus mena saka parnoki tanurtem dak memenadaktsütsü atema kanga meranga inyakogo, ta Dr Ray-isa metetdaksü.

COVID mezüngbuba wara nung COVID putetab tetsütemji AGMC aser GBP hospital nung dang anepalu, ta Medical Superintendent Dr. Sanjib Debbarma-ia ashi.

Silchar nung black fungus agi shiranger ka putet



Silchar, June 5, 2021 (Agencies): Assam kübok Silchar Medical College and Hospital (SMCH) nung COVID-19 puteta alir ka dak black fungus (Mucormycosis) aliba putetogo.

Shiranger indang biopsy report nung Black Fungus aliba ngutetogo ta SMCH nung doctor temi ashi.

"Black Fungal aliba putetstü atema potassium hydroxide tendangba nung positive putet. Karimganj district nungi shiranger indang biopsy aser culture report temji Brihostibarnü angu aser iba nung pa dak mucormycosis (Black Fungus) aliba ngutetogo" ta SMCH nung vice principal, Dr Bhaskar Gupta-i metetdaksü.

Iba nisungji Medicine ward nung anepaludar, ta Gupta-isa ashi.

"Pa temangbo junga dang lir saka pa lendong nungi jenbuogo

ta meshiteter. Onoki pa kanga junga repringdar aser State protocol ama anepaludar" ta paisa ashi.

"May 5, 2021 nü Karimganj Civil Hospital nung iba nisung dak COVID-19 aliba puteta liasü" ta SMCH principal Dr Babul Bezbaruah-ia ashi.

May 11 nü pa indang sample tendangdang negative adok aser iba jagi mozü kidang nungi yok. Ajisüaka, pa tango junga mesashiteti timtemba agi May 12 nü Silchar nung nija mozü ki ka nung anioka liasü, ta paisa metetdaksü.

May 26 nü pa SMCH nung Department of Ophthalmology dangi anir aru aser tendangdang pa tenük külen waker liasü. Iba denji tezü nung timtem den teni tanganger liasü.

Iba jagi Department of ENT-i nasal endoscopy aser biopsy agiba den swab agiteta tendangba odang Brihostibarnü angu.



TIR YIMYIM YIMOBILEM (EDITORIAL)

DIMAPUR AMUNGNÜ, AAMI (JUNE) 06, 2021

Timtem mapang Tsüngrem bushiba

Asenok asoshi tesüngmangtsü taochi ola kaji timtem mapang ya asenok Tsüngrem dak amangertem asoshibo Tsüngrem sentsüwangshidaktsütsü lenmang ngutetba mapang lir. Atangji, timtem mapangji majung saka timtem mapang ajanga asenok nem Tsüngrem tashi aser taochi angatetdaksütsü Pai asenok nem taochi lenmang ka lapokja lir. Ibaji asenoki Tenüngsang Ken 50:15 nung angur. Iba lai tekong nung Kibuba Tsüngremi asenok dang ashir, " timtemba mapang nung kü dang shiang, ni' na kümzüktsü aser nai ni sentsüwangshidaktsütsü." Atangji, anema lia aser kaa itta aliba mapangbo asenok aikati Tsüngrem nem tenüngsang agütsütsü amadoker, kechiyong asenoki asenoksasa inyaktet aser taküm alir amai bilemer. Ajsüüaka, kodang shirangdir mesüra timtem ajurudir, idangji dang asenoki Tsüngrem bilemtetter aser Tsüngrem dang teyari meshir. Aji oda, Tsüngremi asenok yarir aser aneptsür. Iba tashiji dang asenoki amanger, anungji asenok timtem nungi kümzükba sülenbo asenoki anosa Tsüngrem amadoker. Ajsüüaka, kodang asenoki Lai o nungji Tsüngrem tenangzükbaji angatetsü merangdir, asenoki Tsüngrem dang mepishiba ama Pai kümzükbaji tatem masü saka ibaji ajanga asenoki Pa sentsüwangshidaktsütsü asoshi yariba mesüra aneptsüba lir ta asenoki angatetsü. Aji oda, asenok alima nung alir asünungji, aiben asenoki Tsüngrem amadoker aser tamangjung inyaker. Kasa Tenüngsang ken 50 tekong 18 nungbo, " nai auer aser nüktapangtartem mapa nung haihaura akaba dang masü saka nai dena parnok den külemi auyar aser nüktapangta benshir," ta shia angutsü. Iba amaji asenoki temenensa temenen Tsüngrem anema inyakaka asenok taküm aser kibong tajungba aser takarba dang akümer. Idangji asenoki asenoksasa asen mapa agi Tsüngrem peladaksür amai bilemer. Iba tangatetba nung asenoki meteta temenen mapa inyakli Pa nem tenla agütsüli ta Tsüngrem nem rongsen tenla agütsüba agi asenok taidok aser temeten angutsü amai bilema inyaker. Ajsüüaka, kasa Tenüngsang ken tapu 50 nungjisa ashir, asenoki Tsüngrem nem alima rongsen tapu tapu tenla agütsübaji kecha jenjang maka, kechiyong item ajaki Pa meyong lir ta shia angutsü. Tetezü, asenoki asen meyong ama bilema Tsüngrem nem tenla tapu balala agütsür saka itemji, shitakbabo, Tsüngrem meyong Tsüngrem nem agütsür. Asen nema tangar kati asen meyong sen bener arua agütsü nung kechi balaka pelatsü ali ? Aji oda, Tsüngremi asenok dang nungi imlabaji, rongsen tenla masü, Pa tenüng sanga lidaktsüner ta kasa tapu tekong 14 nung shia angutsü. Atangji, asen akaba ajak ya Tsüngremi agütsü, anungji Pa tenüng sanga alitsübaji tasak masü saka asenoki amadoker aser Tsüngrema mali aser Tsüngremia mangur ama asenoki inyaker aser alir. Item ama nisungtemji Tenüngsang ken 137 nung ashir, ayi ama lepdoktsü aser kongadoktsü . Iba tesama tiaji majurutsü atema Tsüngremi asen taküm aser kibong nem timtem, shilumanem aser shisabolu agi aleper taochi yoker. Aji oda, na tang shiranga lira mesüra shisabolu tia kar danga ajurua lira, Tenüngsang ken 50:15 nung ashiba ama, Tsüngrem dang sarasademang, Pai na kümzüktsü aser nai Pa sentsüwangshidaktsütsü. Asenoki asenok timtem ajuruba ya, kodang, timtem ama masü saka Tsüngremi ajar ama angateta Tsüngrem anasai odir, atangji Pai langzüksü. David chubai Tenüngsang ken 30:9&9 nung sarasademba ama, asenok sür onkeni alu nung Pa kechi tajangzük ali ? Auyi aser ajungli jagi Kibuba asangtsü asü ? Iba jagi Kibuba dak temulung lemtetba indang ashitsü asü ? Kibubai aji meteta lir, anungji asenok onken jagi malutsü aser mesamatsü atema asenok temenen nung nemzua alidang Pai asenok kümzükner. Na timtem nung alidang kü dang shiang, ni na kümzükdi ta ashiba o ji taochi koda tulu aser koda tejenokdak tajung. Atangji, tangbo asenok aika anema alitsüa akok mesüra kecha agia timmedemi jangratema alitsüa akok, item jangratemsü aser tepelatsü anogotemji asenok atema Tsüngrem taochi amadokba anogo masütsüla aser kar danga timtem nung lira, Kibubaisa ashir, " kü dang shiang, ni na kümzüktsü."

OLEMSABANG

KHRISTAN KIBONG NUNG KILIR KODA AYUTSÜ ASER ANEBALUTSÜ?

- Ms. Sashikümla Longkümer

Tebilemtsü onük

Tejak o tejak na nguyotepa sayutsü aser angazükteptsübo doktsür nisung ana danga sadoka majurutetba, mejembitetba tekangshi mapang, saka tanübo media balala ajanga shisaluyim balala agütsüba aser angazükba mapang tajung ka nung, Yanglushidi Sensaksem Sabang (YSS) koba nung Aortamanger tajungtem, laishir mongintem, arogo lenirtem, osang zülurtem, tesayurtem, shisashirtem aser lenirtem tajung aikamapang aben asen lokdi tebilemtsü (issues) balala lemsatepa arur. Taoba hopta kilir ayuba dak sentakba onük nung jembu, aser yangi tejembiba olen kar Khristan ka teinyaktsü lemsateper.

Nisung shingaia kilir mapa meinyaker. Saka sensaker kibong nungi koda masü timtem ajanga tangar kidangi oa kilir mapa inyaktsüsa akümer. Kilir aika kiburi tajung kümdaktsüba otsü lir, saka kari school nung züngdaktsütsü ta mesüzüka anir aotsü saka schooli meyoki ki mapa dang inyakdaktsür; kibur karibo alar aser shiruru jenjang nung yutsür. Kar kidangbo süoshi, chiyungtsü peria magütsür, kimalen mejangdaktsüba atalokba osang lir. Chisüng, tanung tera chiyungdaktsür anogo piyong mapa inyakdaktsür. Kilirji Tsüngremi Pa mesükba nung yangluba meimchir taküm ka, saka kiburi meima mebenshiba, mezüngokba aser tashiyim mapa inyakba tatalokba aika ajangshia arudagi. Kiliri inyaktsübaji repringdangra, normal hachira dang nungi tali agütsütsü langa inyaktsür, saka taah-bo inyakba yari magütsür. Kiburi meinyaknuba ajak inyakdaktsütsü, saka kibur karibo shiruru dak amai tila tanur daka sünga azükba ataloker. Khristantemi kilir rishikangshia, züka, mapa tali inyakdakja ayuba ya tim asü masü? Ya temenen tulutiba masü no? Kilir exploitation anema arogoi kechi inyaktsü? Yimdeni kechi inyaktsü? Taah koma agütsütsü? Kibur shirnoki kilir rishikangshir, azüker, malnourish süa yutsü parnok anema senso ka teinyaktsü kechisa? DAYO, MTLT, Watsü mungdang, Ao Senden, ABAM, yimtsüng yimden, lim arogo teinyaktsü kechisa? Laishibai kilir koma ayutsü iba indang kechi ashir?

Kilir koba jenjang nung ayur?

Kilir ta kodang südir alar amai, mini, kanja ta menüja bilemer, lujaa repringer. Aseni sen talang agi alizüka ayuba oset-tsüset ka amai bilemer, aser machine mesüra shiruru amai mazüngi dang inyaka lidaktsüner. Nisung kar touthi marem, kidangi meyipa odi ta asü dang, kiburi nai aosu kwi chiyungogo, aji meiyptsür oang ta mezüngmeshia o tamajung ashiba otsü lir. Nisung shingai meimchir ayoktsü aser alitsü özüngi memelar. Kilirtemji alar masü, saka nüchi taküm ka ka lir. Parnokji asen teyari nungdakba agi bushia anir aru nungji "teyariteper" ta asü tajungba, saka iba ocet nung kilir aser teyariteper anaprongla meyoktepa dang amshir.

Kilir ta kodang südir pa/laji nisung kar kidang ki mapa balala yaritepa mesüra tanur repringa alirtem ta ashitsü akok. Kuli balala ajanga tangar ka kidangi oa yaritepa alitsüsa akümer:

- Tsürabur maka-mait tangar kidang kilir akümba;
- Jila nung mapa makartem hachira amai inyakba; mapang tatakzük ita sen paika ya agütsütsü ta tangatetep nung inyakdaktsür;
- Yimtsüng nung alirtem mapa bushia arurtem, training balala agirtem kilir ama arua aliba;
- Tsürabur den tangatetep nung school nung züngdaktsütsü ta anir aruba nisungtem;
- Tsürabur asü-ama ajurua tanur tangar kidang kilir mapa inyakba;
- Karbo tashiyim agi pur mesüra mesüzüka anir oa ayokba, ano aika.

Kilir kaji koda ayur? Koma ayutsü? Özüngi kilir koma ayutsü melar? Asen lima özüngi melaba ama kilir ayur masü? Taah koma agütsür? Khristan kati kilir koma ayutsü? Lai tesayuba kechi? Itemi kanga aroka shisadangtsü mapang ka.

Kilirji asen tsürabur mapang nungi yua aru. Parnoki anitetba aika minister, govt. mapa nung tulur, tesayur, pastor, tetsür pastor, lanur pastor ta adokdakja asen Aor akhümtsüba tesendaktep tajung nung aru. Aikati pei chir ama meimba aser anebaluba mapa tajung kuli aika lir. Kilir koma ayutsü ta asü dangdang, Pastor kati yamai langzü, "Ozü kidang Arunachal nungi jabaso tajung ka joko küm 7 buba alir. Khen danga kidangi modang, pai kidangi moner, küm ishika tejakdang nungi par tsürabur aser kinunger den ajuruteptsü khen danga or arung ta ashir saka pai moner. Tang jabasoji class 12 nung azünger. 1st& 2nd position dang ngua atur, class 10 nunga distinction subject 3 nung angu. Sentep tekülemi kü kinungtsü tena külemi oa amener, pa lesson bushitsü mapang peria agütsür, sports asayatsü mapang agütsür, anungdanga pa mejangtsü mapang agiteta agütsür. Teti külemi langpang ka nung mener chiyunger, sarasadem mapang nung teti par tsürabur aser kinunger bilemteter. Itemji kibur teinyaktsütem lir." Yangi kilir ka koda ayutsü tejangja angur. Khristan kati kilir kaji alar ama asü, saka pei chir amai meimtsüla aser benshitsü. Asenoki kodang kilir tajungtiba nung yudir aser meima anebaludir, iba jagi asen Ao kin tenüng atutsü aser Tsüngremi meyipa asen kibong aser kin moatsütsü. Nisung shiba, kibong shiri mesüra kin kobai meimchir mezüngmeshia amshir parnokji kodanga temoatsü mangutsü. Atakatem angutsü ta metetdi. Nisung shibai tangar akhüm metsübur, pa/laji shiangia akhüm metsübuttsü. Aori tangar nem akhüm tsübudaktsüner, asenoki tangar tama akhümtsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Moapu nung tekülem sentong agiba atema Arogo dang senchi achi



Taoba ita Canada kübok Ontario nung Church of God Arogoi moapu nung tekülem sentong agidang tangokba noksa nung angur.

June 05, 2021: Canada nung coronavirus tenokdangba anema moapu nung tekülem sentong asem agiba atema tan hopta Arogo ka dang senchi dollar 66,000 chiogo.

Ontario kübok Aylmer nung aliba Church of God Arogoi May 16, May 23 aser May 30 anogotem nung moapu nung tekülem sentong agia liasü. Iba Arogoi coronavirus tenokdangba anema Tenla kidang tekülem sentong agiba sülen court kati iba Tenla ki shibangtsü tuyuba ajanga Arogoi moapu nung tekülem sentong ayongzüka agi.

Sorkar ketdangsertemi Tenla ki shibangtsüba agi Arogo züngsemtemi moapu nung tekülem sentong agi, ta Arogo lenirtemi metetdaksü.

"Onok Tenla ki shibangtsüyonga Tsüngrem t u s h i t s ü l a , sentsüwangshidaktsüsüla aser

tenünsang agütsüsüla," ta May 15 nü Arogoi Facebook post ka ajanga metetdakja liasü.

Superior Court nung Justice Bruce Thomas-i iba Tenla ki shibangtsü tuyu aser Arogo lenir ana dang senchi dollar 66,000 agüjang, ta tuyu.

May 14 nüa court-i Arogo dang senchi dollar 100,000 agüjang ta tuyur liasü.

Arogo züngsemtem moapu nung tekülem sentong agibaji Police-i repranga ataba sülen tekülem sentong nung adenertem züngdanga liasü.

May 30 nü tekülem sentong nung nisung 283 aden, May 23 nü nisung 300 dak tema aden aser May 16 nü nisung 400 dak tema tekülem sentong nung dena liasü.

May ita tatembanglen police-i, "Aylmer Police-i maneni iba Arogo aser züngsemtem mita reprangtsü, aser ibaji nüburtem wara nungi kümzüksü atema

lir," ta metetdakja liasü.

April ita nung Justice Bruce Thomas-i, iba Arogoi court mezüngmeshiogo, ta shia tekülem sentong magitsü metetdakja liasü.

Ajisüaka Arogo züngsemtemi, tamangertem adenshia külemtsüji Laishiba nung shia lir, ta tangatetba nung maneni moapu nung tekülem sentong agia aru.

May 14 nü Arogo nung pastor, Henry Hildebrandt-i Facebook nung live video ka ajanga Tenyartem Mapa tapu 5 zünga, "Arogoi nisungi ashiba dang nungibo Tsüngremi ashiba dang angatsü," ta metetdakja liasü.

Paisa, linük nung aser province nung lenirtemi Tsüngrem amadokogo, ta aitsü.

"Khristan linük, ta ajaba linük kati iba tashi ang inyakteter. Lenirtemi Tsüngrem amadokogo," ta pastor-i metetdakja liasü.

Lauren Daigle-i Christian Songs Chart temaba jenjang ponguben angur

June 05, 2021: Grammy Award ana tashi angula osangtajung kentener, Lauren Daigle indang ken tasenba "Hold on to Me" ajanga Billboard's Hot Christian Songs Chart nung temaba jenjang ngutetogo; tang agi pongubenbuba Billboard's Hot Christian Songs list nung lai temaba jenjang angur.

2003 küm Billboard's Hot Christian Songs chart tenzüka sülen tetsür kentener tem

rongnung lai iba chart nung temaba jenjang timba ngutetogo.

Kentener telok sasep nungbo MercyMe-i Billboard's Hot Christian Songs temaba kenjang 13 ben nguteta lir.

United States nung "Hold on to Me" ken ya hopta ka tsüingda million 1.8 ben stream süogo, ta Billboard kibur company, MRC Data-i metetdaksü.

Daigle-i 'The Voice' sentong nung Hold on to Me ken atenba

sülen iba ken ayokba shilem 228 agi timba aküm aser 5,500 ben download asü.

2019 küm yimti balala nung kentena senzüba mapang nung Daigle-i "Hold on to Me" ken zülua liasü. La indang ken "You Say" ajanga Billboard Chart nung temaba jenjang anguba sülen maneni Hold On To Me ken ajangaa kasa jenjang angur.

"Hold on to Me" ken ya lai Paul Duncan aser Paul Mabury na den senteper zülü.

ANOGO ABEN TSÜNGREM DEN

Taküm tasen

Anungji nisung kar Khrista nung lira, pa tasen poktetba. Tejenbaji süiogo, ajiang, ajak tasen kümogo. 2 Korint 5:17.

Yisu ne mulungi aitang ta asüngdangba agi na khristan ka maküm. Kodang na tanaben aso, na Khristan ka aküm. Yisui ashi, "Atangji Zünpung ni ne dang shidi, tanaben mesora, nisungi Tsüngrem yimli mungutettsü" (Yn. 3:3). Sarasadem ka ashiba mesüra yimjak nung telemtetba agiba mesüra telemtetba agi card ka sign asüba agi na mekümzüksü. Tanaben asoba agi dang aji inyaksü akok. Tenyar Pauli ashir, kodang na "Khrista nung lidir" tejenbaji süitemer. Na tekümtet anguba anogo nung nai menaa aliba temenentem ajak adoker. Yirur na timtema aruba ajak tanebtsü angur. Nai tamakok ngua arua liaka temeim aser agizükba ne meyong akümer. Timtem tekangshi ajak joko mali moatsür.

Kari na tanela nung tanaben asoba tesüngmangtsüji nemea kümdaktsüsü ashiba nai angashitsü akok. "Tang na "Khristan süa nai tesüiba nung kechisa ajangshia aru ajakji ajangtsü aser ibaji akoktsü mapang agitsü" ta mesüra, "Na tanaben asotsü akok saka maneni na temenen den rarateptsü, aser nai ne tashi mait nung takok angutsü ta yimlar.

Tebilemstüji shibai na tanaben sodaktsür pa dangi asen taküm aotsü melen aseni merangba agi tanaben asotsü merangbaji lir. Na temenen nungi nüji akümstü asoshi Laishiba nung tabensa kuli agütsübaji Yisu Khrista aser Tsüngremer chir asütsübaji teperi. Satani ibaji masü ta na mesüzüksü bushir. Shiba dang nai amangtsü?

Protestant Churches of Algeria nem Tenla ki ka meyipa agütsü

June 05, 2021: Küm 10 temepishiba ken o ka benoka jungnüa court nung ken o liasü. 2019 küm May ita nung angadanga aruba sülen tesüsa court-i iba Tenla kiji EPA nem Algeria kübok Mostaganem meyipa agüjang ta obendang nung aliba Tenla ki ka Église agütsü, ajisüaka parnoki ita ana tsüingda meyipa magütsütetba ajangang ozüing kübok sota ataba sülen tesüsa taoba ita (May) EPA nem iba Tenla ki meyipa agütsüogo.

Mostaganem Arogo ya EPA kübok lir aser sorkari agizükba Arogo rongnung densema lir.

Iba Tenla ki ya 2011 küm tashi public health center ama amshia aruba sülen ketdangsertemi maneni health organization ka nem agüja liasü.

2012 küm EPA-i iba Tenla kiji meyipa agüjang ta shibangja lir.



World Environment Day nüngtem nung Longmisa Kaketshir Senden Reju (LKSR) aser Longmisa Baptist Arogo Youth Ministry külemi longjemer "Asen yimtsüng merakti" ta asüba omen nung ajemdaker June 5, 2021 anogo Longmisa yimdak telongzük nung lokti sendenba tesemtem, tenlaki, community hall, health center, library aser lokti jajaba lenmangtem müreka aser iba den külemi sengtonglitong tema jaja liasü.

OLONG PAITEP # 5835

1			2			3		4		
					5					
		6								
							7			
		8								
9										10
					11	12				
13										
14						15				

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 5834 TELANGZÜBA

TIPILEN :	LANGTSÜNGLEN :
1. Kasa, 6. Rangben, 7. Mait,	1. Khu, 2. Süjak, 3. Onük, 4. Oba,
9. Poktet, 11. Ati, 13. Atasa, 16. Rür,	5. Anü, 6. Ratet, 7. Mozü, 8. Ita, 10. Tar,
17. Rajang, 20. Lanu, 24. Nüngjem,	12. Tinu, 14. Salem, 15. Aja, 18. Anünü,
25. Süra.	19. Taju, 21. Ano, 22. Onü, 23. Kua.

KOMA SÜLA TELANGZÜBA

Q. Asenok Aotsür Aor kidang tangar nisung kilir mayu nunga koma süla ?

Aotsür Aor tanursa mapa tashiba tabensaba nung Pei chimurji intetla, kidang yariteper ayuba agi, tanur aika tazüngba nunga tanger junga memenep ano Pei liaotsü atema mapa mashi-ta temeimtsü tanur aika kangshidagi, anungji Pei taküm atema Pei sasa inyaka chia jema alitsü angazükdaktsüsüla.

- T.Imti Jamir

Takar sür tangateter kidang kiler ayuba kiler tsürabur adianu ajak pelatsüsa kibur asoshi sarasademja aser arishi temoatsü meshija moaja alir saka maka sür mangateter kidang kiler ayubaji kiler asoshia ayatai aser item jagi adianu aser yimer maksüdaktsür, anungji mangateter kidangbo keni kilir mayutsüla - n s Jr cmd Asen Aor kidang tangar nisung kilir mayu nung kangasa jungla. Item ayuba jagi tanurtemjia yimya yimpong ajak par mesüka inteter. Ano asenoka mapa ajak nung azümasen akümer. Ano tanurtemi joko asen o mashi Nagamese oshi tang masü sobaliba samaa odagi. Kanga süökü ia shisatangtsüla.

-SMS

Kilir mayununga kanga dang timatemsü. Ayutsüako saka shiri lba ama merenshiba ngudir aser putettir Ao senden ajanga ozüng tesashi ka yanglua ayu nung kanga dang ajungtsü. Tanü asüngbo second nung prokshiadoktsüji aputsü kecha tasak mali meimchir shisatsü madenba shiruru shisatsü dena aliba rokokem kari iba ama inyakba ajanga kin ajak tenüng menoktsür

- T. L chumu

Aor kidang kilir mayu nunga koda süla ta asüba nung kü tangatetba: Takar aliba ajanga kilirtem aika mapa inyaktsu angur aser kibong mesür. Ano kilir ayuba ajanga nungdaka aliba kibongtem aika ajangzucker. Talisa kiburi kilirji meima aser Tsungrem tsububa nung amshira pelashishia tenzuktsu. Kilirji ayu tajungba saka kilirji alar masü ta angatetsüla.

- SMS

Kilir ayubaji junger saka pei nisungi dang raksatsürji mayu tajungba.

-SMS

AO OSHI ANGAZÜKDAK:
TANÜ ANGAZÜKTSÜBA OJANG

Jenzük
(v) miima ao / tzüjang tilala alua tsükba (flee secretly / water dripping) Tir Yimyim
Nisung tamajunger ket nungi pa tia junga **jenzük**.
Kilem tapok nungi tzü jenzüka alu.

Jetzük
(v) süngdong nungi tamajung kümer tsüka adokba (shedding)
Tsüngküm mapang süngdong nungi süngo tu aika **jetzüka** tsüker.

NAI-A YA METETTER MA?

INDIA NUNG NÜBURTEMI SAPUA ALIBA GARI KAR: (MAY 2021)

1. Hyundai Creta	7,527
2. Maruti Suzuki Swift	7,005
3. Kia Sonet	6,627
4. Tata Nexon	6,439
5. Maruti Suzuki Dzire	5,819
6. Hyundai Venue	4,840
7. Maruti Suzuki Baleno	4,803
8. Kia Seltos	4,277
9. Hyundai Grand i10 Nios	3,804
10. Mahindra Bolero	3,517

TANÜBO NAI LANGZÜANG

Q. Koba tentet ajanga India nung national income indang data saya?
A.NSSO B.CSO C.NITI Aayog

_____ (Taruba adok nung onoki langzüksü)

YASHI ADOK TELANGZÜBA: Ministry of Personnel and Training

SUDOKU # 5877 TELANGZUBA # 5876

6	9					3	3	6	5	8	4	2	9	1	7
	5	8	9	3		6		7					2	7	1
		7	8	2		9							9	8	4
9	3		7	6	2								7	1	9
				5		7							8	5	3
7	6		1	4		2	3	9					6	4	2
4					5								1	9	7
5		2	6		1		8						5	2	6
8	1				3	9	5	2					4	3	8

OJANG LUTEP # 5421

OATEMSTÜ :

IAG :

ÜKTEN :

SÜNGMABA :

RAMESÜ :

MTTIEM :

AKTILA :

REMBMAA :

TSÜSHISA :

OKAAZÜNG :

OJANG LUTEP TELANGZÜBA # 5420

WAROI PEI TEPOR AJUNG PENZÜDANG OSAK MORI NUNG AREM AMA

TAN HOPTA ATEMA - KOMA SÜLA ?

Q. Center government nungi Nagaland atema Covid-19 tongpang nung amshitsü yokba sen ajak yimsüsür aser tulurtemi chia-adok nunga koma süla ?



June 05, 2021 nü New Delhi nung Union Finance Minister, Nirmala Sitharaman-i public & private insurance companies nung ketdangsertem den senden amenba noksa nung angur. PM Jeevan Jyoti Bima Yojana (PMJBY) aser PM Suraksha Bima Yojana (PMSBY) tekaraba nung agütsü atema senden nung jembu.

Delhi sorkari ki tonga ration bener otsüba scheme Centre-i nokdanger

New Delhi, Aami/June 05 (Agencies): Delhi sorkari nüburtem nem ki tonga rations bener otsütsü nükjidong nung tenzüka scheme Centre sorkari maneni nokdanger, ta Honibarnü Delhi sorkari metetdaksü.

Iba onük dak sendakba nung AAP tongti lenir aser Delhi Chief Minister, Arvin Kejriwal-i Amongnü (June 6) anüingdang 11:00 ako nungi osangbenertem senden ka ayongzüka osangbenertem den jembitsü.

Osang angazükba agi, Delhi sorkari iba scheme ya taruba anogo ana tsüingda tenzüksü sentong yanglur liasü saka Centre sorkari nokdanger.

Delhi nung Kejriwal-i aniba sorkari sensaker lakh 72 nem ki tonga ration chiyungtsü bener otsütsü nükjidong nung iba scheme tenzüksü sentong liasü.

Delhi sorkari, tang ama coronavirus wara mapang nung iba scheme ajanga nisung aikati anisüingzük angutsü, ta sangdonger liasü.

"Iba scheme metenzükdangyongi Centre

sorkari iba scheme nokdanger. Iba scheme atema temelaba memeshi ta Centre-i ashir," ta osang angazüker.

Delhi Lieutenant Governor-ia iba scheme indang court nung ken o benoka lir, ta shia iba scheme indang file magizük, ta chief minister office sangdong ka nung metetdaksü.

Delhi Food Minister, Imran Hussain-i, "Tang aliba ozüingtem kübok iba ama scheme tenzüksü atema temelaba meshitsü menüingdak. Tang court nung ken o ka benoka aliba dak sendakba nung iba scheme metenzüktsü atema court- tuyua mali. Iba scheme nokdangba ya yimtenren tsütsü inyakba lir," ta metetdaksü.

Taküm March ita nung Centre-i Delhi sorkar dang iba scheme meinyaktsüla, kechiyong National Food Security Act (NFSA) kübok iba scheme atema jang agütsütsü memelar, ta metetdakja liasü.

Centre sorkari, item jangji NFSA dak alaka tanga nüngtem nung amshitsü memelar; iba Act kübok ibaji memelar, ta

metetdaksü. Centre-isa, Delhi sorkari NFSA masü saka tanga scheme ka kübok benokra melatsü akok, ta metetdaksü.

Centre-i ashishiba sülen Delhi sorkari iba scheme nungja shidakba- Mukhyamantri Ghar Ghar Ration Yojana melen aser tang aliba NFS Act kübok kishizüing tashi oa ration agütsütsü lemteta maparen inyak saka Centre sorkari nokdanger.

Iba scheme kübok ration card alirtemi nisung shia nem wheat flour (atta) seret 4, jang seret 1 aser shini seret ka angutsü; parnoki fair price shops-i aotsü menüingdak kechiyong sorkari kishizüing tashi rations bener arutsütsü.

"Aiben ration shops shibanger alir, jang tajung mangur, ration dealers-i ajemer agütsür, ration shops-i aiben aotsüsa akümer aser rations black market nung ayoker, anungji item kuli nung ajemdaker iba scheme tenzüker," ta Delhi sorkari metetdakja liasü.

India nung ano nisung lakh 1.2 dak Covid putet aser 3,380 asü

New Delhi, June 05 (Agencies): India kübok states aser Union Territories aika nung coronavirus case ajema putetba mapang India nung tesüiba ghonda 24 tsüingda nisung lakh 1.2 dak coronavirus putet, aser ibaji tesüiba anogo 58 tsüingda anogo ka kija nung ishitiba putetba lir, ta Honibarnü Union Health Ministry-i metetdaksü.

Tesüiba ghonda 24 nungsa linük nung coronavirus tashidak agi shiranger 3,380 asü; India nung tang tashi nung nisung ajak

agi 2,86,94,879 dak coronavirus putetogo aser iba tashidak agi asür ajak agi 3,44,082 jungogo, ta Union health ministry data ajanga metetdaksü.

Tang linük nung iba tashidak agi teshirangdakpur 15,55,248 dang kümogo aser tanü agi anogo pongububa linük nung iba tashidak agi teshirangdakpur lakh 2 den tajemba lir.

Brihostibarnü linük nung samples 20,84,421 tendang aser tang tashi nungbo samples ajak senteper 36,11,74,142 tendangogo.



June 05, 2021 nü Lucknow nung World Environment Day anogomong nung Samajwadi Party Tir, Akhilesh Yadav leniba nung party nung inyaker temi party HQ telung nung süngdong atemba noksa nung angur.

West Bengal nung vaccination certificates nung Mamata noksa amshir

Kolkata, June 05 (Agencies): West Bengal state sorkari sponsor süa arrshi küm 18-44 pur nem Covid-19 vaccine agütsüba vaccination certificates nung Chief Minister, Mamata Banerjee noksa amshir, ta ketdangser kati metetdaksü.

Honibarnü ketdangser kati, state sorkari state senpong nungi indangindanga vaccines alizüker, ibayongji vaccine agütsüba certificates nung chief minister noksa amshir, ta metetdaksü.

State nung vaccine agir arrshi küm 45 aser temapurtem vaccination certificates nungbo Ato kilonser, Narendra Modi noksa lir, ajisüaka arrshi küm 18-44 pur vaccination certificates nungbo Mamata Banerjee noksa amshir.

State sorkar ketdangserisa, "State sorkari ozü nütsüing nem agütsütsü atema vaccine yanglurtem dang nungi indangindanga vaccine alizüker. Ibayongji onoki certificates nung Chief Minister noksa amshitsü telemtetba agi," ta metetdaksü.

State nung Housing Minister aser Kolkata Municipal Corporation board of administrators nung Chairman, Firhad Hakim-i, "Ibaji tim dang, kechiyong Centre sorkari arrshi küm 18-44 pur vaccination atema sen magütsür saka state senpong nungi sen indoker, anungji onoki Chief Minister noksa amshir," ta metetdaksü.

Hakim-isa, "Vaccination Certificates nungji vaccine indang osang ajak lir. Vaccine batch number nungi tenzüker CoWIN Registration number tashi lir. Iba dak alia Chief Minister-i jembiba oren ka lir," ta

metetdaksü. Hakim-isa, iba nung ya tashishitsü kecha mali, Punjab, Chhattisgarh aser Jharkhand state temia arrshi küm 18-44 pur nem vaccine agütsüba certificates nung chief minister tem noksa amshidar, ta metetdaksü.

Hokolbar tashi nung West Bengal state sorkari arrshi küm 18-44 pur nem agütsütsü atema vaccine alizükba nung sen crore 150 jungnüa indokogo, aser tang tashi nung parnok lakh 29 nem vaccine agütsüogo, ta ketdangser kati metetdaksü.

Tawa Bengal assembly election nung Trinamool Congress-i Election Connection of India (ECI) dang, vaccination certificates nung Ato kilonser noksa amshiba ya election model code of conduct (MCC) alema lir, ta ashishia liasü. Iba sülen vaccination certificates nung Ato kilonser noksa mamshi saka election tembangba sülen nungibo vaccination certificates nung Ato kilonser noksa amshi tenzükogo.

Certificates nung Mamata Banerjee noksa amshiba ashishia Bankura nungi BJP MP, Dr Subhas Sarkar-i, iba ya TMC indang politics lir, ta aitsü.

Sarkar-i, "Alima nung coronavirus vaccine yangluba linük pongu dang lir aser item linük rongnung India densema lir. Iba atemaji asenoki nüma atanger. Ato kilonser ya asen lenir aser pa leniba kübok nüburtem nem vaccine agütsür, aser senso ajaki ibaji meteta dang lir. Anungji certificates nung vaccine alizükertem indang noksa dang amshitsüla ta mali," ta metetdaksü.

Covid-19 wave tanabuba nung doctor 646 tashi süogo: IMA

New Delhi, Aami/June 05 (Agencies): Honibarnü Indian Medical Association (IMA)-i sangdong ka ajanga, linük nung coronavirus wave tanabuba prokba mapang nung doctor 646 coronavirus tashidak agi süogo, ta metetdaksü.

Covid wave tanabuba tenzüka sülen nungi June 5, 2021 anogo tashi nung Delhi nung doctor 109 coronavirus tashidak agi asü, Bihar nung 97, Uttar Pradesh nung 79, Rajasthan nung 43, Jharkhand nung 39, Gujarat nung 37,

Andhra Pradesh nung 35, Telangana nung 34 aser West Bengal nung doctor 30 süogo, ta IMA-i metetdaksü. IMA-i ashiba agi, linük nung mezüngbuba coronavirus wave mapang nunga doctor 748 coronavirus tashidak agi asü.



New Delhi, June 05, 2021: India nung petrol aser diesel totzü jenjang kanga atuba anema Honibarnü New Delhi nung Indian Youth Congress züingsemtemi sorkar anema longkak aitba noksa nung angur.

SÜR KÜM 1 AJUNGBA RONGSENBENLA IMSONG

06/06/2020 - 06/06/2021



Onoki teti meima aliba adianu bilemteter. "Nai nü taküm yimya agi onok dang tatishitsü tajung aika sayuogo."

Tsüngremi na anir aoba anogo nung onok shilem ka bener ogo. "Tasüba ya tatemang masü, saka ano maneni alitsü."

"Kechisarena asoshi tsüngküm ka lir, aser anüng kübok mapa ajak asoshi pei mapang tatakter lir." Sayutsüngir 3:1

ONOKI NA KANGA MENUNGRAR
~ Temeim Adianutem.

Office of the
Longjang Senso Telongjem Mokokchung
TEPELA LEMSATEPER

State Bank of India Mokokchung nung Miss Tsukjemchila Jamir D/o. Mr & Mrs. Bendang T Jamir (Alongmen Ward Mokokchung), lai Chief Manager menden tongtetba atema pelar aser tenüngsang tulu agütsür. La mapa nung tajungtiba agi takok nung tenzüksü Longjang Senso Telongjem Mendendi ajanga tamang akar.

Nübur ajaki la lenisüba kübok ama-litpe akatsü ayongzüker.

Sd/- T. Sashi Imchen President, LSTM	Sd/- Limanungsang Jamir Secretary, LSTM
---	--

Ita tsüngda Kim tang mezüngbuba party senden nung shilem agi

Seoul, Aami/June 5 lemsatep, ta NK News-i ashi. (Agencies): Ita ka tsüngda North Korean lenir Kim Jong Un-i tang mezüngbuba yimjak nung party senden ka nung shilem agiba state media ajanga sayuogo. Linük rongsenketsüng mejung akümba ajungkettsü atema party senden nung sensaksema liasü.

Kim-i, "Nüburtem libaliro jenjang ajungkettsü aser rongsenketsüng maparen atema bangdaka aliba teblemstütem bentettsü asoshi state inyakyim talila benoktsüla," ta ashiba official Korean Central News Agency-i Honibarnü metetdaksü. Party Central Committee senden ka June ita tetenzüklen agitsü, ta KCNA-i ashi.

Kim-isa, lenla balala nung tongtiba maparen balala benoka inyakba asadangogo, ta stata media-i ashi.

Küm tem tsüngda North Korea rongsenketsüng jenjang kanga mejungi kümer aliba taküm tera tajungba kümogo. Wara pokteter aliba, US-i tenokdangba agütsüba aser China den shishilemba mesütetba ajanga parnok rongsenketsüng mejungi aküm.

Kim, tatamsa May 6 nü yimjak nung shilem agia liasü, iba mapang pai military kibongtem telongjem sentong nung tangokba noksa ka

Iba masüdag pai tang mezüngbuba political congress sülen Pyongyang nung sentong ka nung shilem magitet, ta kasa sangdong ajanga metetdaksü.

Tawa sentong balala nung shilem magiba ya Covid-19 nungi jenboa alitsü atema Kim tasa asütsü akok, ta NK news-i ashi. Pa state ken o balala nung mazüngi liasü asütsü akok mesera tzüküm nung aliba par kidang anizüngzüka liasü asütsü akok, kechiyong satellite image ajang iba tesem nung inyakyim tali akümba sayuogo, ta kasa sangdong ajanga metetdaksü.

North Korea nung parnok lenir indang health jenjang ya kanga meimshir aser linük nung nisung kari dang meteta lir.

Temang tozük tali akümba den moko kanga achiba ajanga küm tem tsüngda Kim indang health dak sendakba nung tasüngdangba aika adoker. 2014 küm pa hopta trok tashi sentong kecha nung shilem magiba sülen ajok mechir senzüba ngua pa gout agi timtemer asütsü akok ta bilem.

Coronavirus wara poktetba sülen Kim mapang talanglang yimjak nung menokdaker. NK News-i ashiba agi, 2020 küm nungi tang tashi nung pa tenetben tashi mapang talanglang yimjak nung shilem magi arudar.

Modi aser Xi nati India-China ken o bentettettsü: Putin

St. Petersburg (Russia), Aami/June 5 (Agencies): Ato Kilonser Narendra Modi aser China tir Xi Jinping na ya khuret abenba lenir ta shia Russia tir Vladimir Putin-i Honibarnü, tena dak linük ana tsüngda mangatettep aliba ya bentettsü asoshi tashi lir, aser iba inyakyim nung tanga tashi nem mejushidaksütsü kanga tongtibang ta ashi.

India, US, Japan aser Australia-i kümtetba Quad telok ya Russia-i yimjang nung aija arudar aser iba dak sendakba nung Vladimir Putin-i news agency Press Trust of India dang ashiba agi, linük ka kechi telok nung shilem agitsüla mesera tanga linük den koda tesendaktep yanglutsüla, ibaji Moscow mulung masü, saka tangar kar dak rangloker tesendaktep yanglubaji tim masü.

Quad telok aser iba telok nung India-i shilem agiba dak sendakba nung pa tebilemba asüngdangba mapang Russia tir-i iba telangzüba agüja liasü. China-i iba telok ya Indo-Pacific region nung Beijing azüoktsü atema tentetba lir ta ashir.

Paisa, India den Russia tesendaktep ya China den tesendaktep aliba ajanga kecha tetsükdaksü madoker, ta ashi.

"India aser China na tsüngda mangatettep kar lir ta ni meteta lir, saka kidanger linüktem tsüngda mangatettep aika alir. Ajisüaka India Ato Kilonser aser China tir na tebilemba aser inyakyim ni meteta lir. Tenaprongla khuret abenba lenir kaka lir aser kati ka akhümtsüba amshir, anungji ken o ajak bentettettsü ta ni amanger."

"Ajisüaka tanga tashi nem inyakyim nung minprong mesükdaksütsüji kanga tongtibang," ta Russia tir-i PTI dang ashi.

India aser China na tsüngda taoba küm May 5 nü Ladakh anüdoklen mangatettep adokba sülen küm ka dak tema odar aser linük anaprongla nungi tasüba den ajangshiogo. Pangong awatsüng temeket nung mangatettep adoker aliba tanga tashi mebentetti lir aser ibala mesükba tanga tesem nunga yimjung atema sensaksem bangdaka lir.

Russia aser China na tesendaktep ajanga Indo-Russia security aser defence cooperation dak kongshitsü asü ta asüngdangba mapang, tir Putin-i India aser Russia na tsüngda tesendaktep ya kati ka dak tamang katetba dak ajemdaker kanga kara takok ngua renloka odar, ta ashi.

"India den temaba jenjang nung tesendaktep tajung yanglutetba atema onok kanga pelar. Item tesendakteptem ya kanga tongtibang lir. Item tesendaktepbatem ajanga economy, energy and hi-tech dak sendakba nung lenla aika ayimjemmer, Defence dak sendakba nung Russia nungi India-i hadir balal aliba indang dang jembirba masü saka kati ka dak tamang akaba dak ajemdaker India den tesendaktep lir," ta pai ashi.

Tir Putin-isa, "Osettsüt yangluba aser talisa India nung, advanced weapon systems and technologies dak sendakba nung

India kija ya Russia indang partner lir, saka linük ana tsüngda tesendaktep ya idakji dang metembanger aser lenla aika nung sendaktepa inyaker," ta ashi

US, India, UK, Germany aser France densema International news agencies tongtibangtem nungi yimozülur teshimtet kar den sensaksema mapang Vladimir Putin-i, Russia aser US tesendaktep, wara pokteter aliba tensa, US-i Russia nem tenokdangba agütsüba aser Gaza ken o amala tongtibang onüktem aika atema telangzüba agüja liasü.

Russia indang Foreign Minister Sergey Lavrov-i, Quad ya "Asian NATO" ta shia aitsüba aser iba telok nung India-i shilem agiba indang asüngdangba mapang Vladimir Putin-i, "Quad nung onoki shilem magir aser tanga linük ka telok kar nung adenba asadangtsüji kü mapa masü aser linük kati koba amala tesendaktep yangluner aji parnok mulung. Ni bilemba ajak agi linüktem tsüngda tesendaktep yangluba ya tangar kar dak rangloker meyaglutsü," ta pai langzü.

June 16 nü Geneva nung US tir Joe Biden den mezüngbuba ajuruptesü lia, Russia tir-i, iba senden ajanga ken o tem bentettsü imlaa matar, ta ashi.

"Onoki mezüngbuba jenjang magir- onok tsüngda tesendaktep mejungi akümba jenjangtem indang jembirba masü. Onoki US anema tenokdangba magütsü; US-iang onok nem mapang ajak nung tamendakdak makai tenokdangba agütsür," ta pai ashi.

Canada nunger firm temi India nem sen crore 354 tenla agütsü

Ottawa, Aami/June 5 (Agencies): India nung Covid-19 wara tanabenbuba poktetshir aliba mapang India den sendaktepa aliba Canada nunger corporate temi tang tashi nung Canada nunger dollar million 59 alang osettsüt India nem tenla agütsüogo.

Canada-India Business Council mesera C-IBC sangdong ka ajanga Hokolbarnü ashiba agi, parnok züngsemtemi senotsü tenla aika agütsüogo aser Canada nunger dollar 58,822,150 (crore 354 shi) alang osettsüt tenla agütsüogo. India nung aliba nüburtem nem teyari agütsütsü atema züngsemtemi mulungso tenla tajung agütsüba atema kanga pelar.

Kasa sangdong ajanga, taoba

hopta ishika state aika nung tashidak menatepa aoba tajemba kümdar, kechiyong vaccine kanga kara agütsüyonga odar. Ajisüaka tesem aika nung ano nisung aika dak tashidak potetdar aser timtem nung lir, ta ashi.

Item kulitem dak ajemdaker C-IBC-i maneni India nunger nem teyari agütsütsü atema inyakdar.

C-IBC tir Victor Thomas-i, "India-Canada economic corridor nung inyaksangshiba Canada nunger company temi teyari tulu agütsüba atema kanga pelar," ta ashi.

Senotsü ya Canadian Red Cross ajanga tenla agütsü aser company karibo medical osettem yoka liasü. Canadian pension funds-i, parnok indang

charters dak ajemdaker tenla magütsütet, saka parnok kübok inyaktem tenla nungi teyari agütsüogo.


Thomas-isa, Canada nunger company temi India timtem nung aliba mapang parnoki akokba yari teyari agütsüba den India den parnok densema aliba osang agütsünü, ta ashi.

C-IBC-i ashiba agi, tenla agütsüba ajanga, khen atema Covid-19 mozüki amenokba, mozükitem nem yipten agütsüba, medical oxygen, mozü, personal protective equipment (PPE) agütsüba, migrants tem nem teyari agütsüba aser India kübok tesem balala nung tashidak azüoktsü atema inyakyim balala benoka inyakba nung teyari agütsüogo.



Sri Lanka kübok Malwana tesem nung tzünglu kanga sashia aruba ajanga tzü agi yimtung metsünger aliba aden nüburtem aoba noksa nung angur. Tzümetsüng aser anentsüh lendong nung tang tashi nung nisung pezü süogo aser nisung tenet samar bushidar. Kasa mapang nung nisung 5000 dak tema talidak makai kümogo, ta ketdangsurtemi Honibarnü metetdaksüogo.

Mulungnen



MAPULEMLA

ASO : 15/10/1947 ASÜ : 19/05/2021

TENLAKABA


ASO : 05/09/1931 ASÜ : 01/06/2021

Onoki teti meima aliba Ojala Mapulemla aser Obala Tenlakaba, Süngratsü, akümlü tembanga asükhu mulungzürep mapang, temeimer kija, kibong, arogo aser lokti balalai sarasadem, nübu, shisatsü aser rongsen agi onok den lemsatepogo, nenok ajak dangi tsüngdong marutet nung iba osang kaket ajanga pelaba lemsateper.

Teyanglur Tsüngremi nenok ajak mojangma.

- Temeim Chirnur aser kinungertem.

BMSCH Kohima-i sentong ka ayongzük



Kohima, Aami/June 05, 2021: World Environment Day anogomung nungtem nung Honibarnü BMSCH Kohima-i "Ecosystem Restoration" omen nung ajemdaker ayongba drawing competition nung shilem agirtem külemi tangokba noksa ka yangi angur.

Kohima, Aami/June 05, 2021 (TYO): IDEAL (IW) Charitable Society tawabangba kübok, Bright Morning Star Children Home (BMSCH) Kohima-i Honibarnü (05.06.2021) World Environment Day anogomung nungtem nung drawing competition ka ayongzük, ta sangdong ka ajanga metetdaksü.

Iba drawing competition ya "Ecosystem restoration" omen nung ajemdaker agiogo. COVID-19 SOPs nung anidaka tanur 20 agi iba tetoktepba nung shilem agia liasü.

Senior category nung Nyiemangmongsen, Avinuo

Ruth aser Rüdülhounuo Rita nungeri mezüngbuba, tanabuba aser tasembuba jenjang nung takok angu.

Junior category nung takok angurtemji - Ist- Maria Ashu, 2nd- Ngomi aser 3rd- Thejavilie nunger alitsü.

Iba drawing competition nung Aleno, Superintendent BMSCH aser Cynthia Kolakhe, Art & Drama Educator na tetendanger liasü.

Aleno-i ashiba agi, asen meküta aliba libajen kümezüka ayutsü asoshi nübur dang tekümdangtsü osang sangoktsütsü nükjidong yur iba sentong ayongzük.

NATIONAL HIGHWAYS & INFRASTRUCTURE DEVELOPMENT CORPORATION LIMITED
(A Govt. of India Undertaking)
Corporate Office : 3rd Floor, PTI Building, 4 - Parliament Street, New Delhi - 110001

F.No. NHIDCL/2(8)/Rectt Fin & HR/2021/HR
National Highways & Infrastructure Development Corporation Limited has been set up by the Government of India as a Corporation under the Ministry of Road Transport & Highways to fast pace construction/up-gradation/widening of National Highways in the North-Eastern Region and areas that share International boundaries with neighbouring countries.

Teküboklen agüja alibatem Contract basis nung inyaksü atema Central Government Ministries/ Departments, Army, Navy, Airforce, BRO (GREF), Autonomous Bodies, Public Sector Undertakings, State Government Departments aser State Government Public Undertakings nung tajangshiba tajung alir retired Officer nungi applicant tem jaoker:-

Sl. No.	Name of the Posts	No. of Vacancy*	Pay Matrix Level in CDA pattern
1.	General Manager (T/P) [Regional Offices of NHIDCL located in North Eastern States, A&N Islands etc.]	**	Pay Matrix Level-13 of 7th CPC [Pre-revised PB - 4 of Rs.37,400-67,000/- plus Grade Pay Rs.8,700/-]
2.	Deputy General Manager (T/P) [Regional Offices of NHIDCL located in North Eastern States, A&N Islands etc.]	20	Pay Matrix Level-12 of 7th CPC [Pre-revised PB-3 of Rs.15,600-39,100/- plus Grade Pay of Rs. 7,600/-]
3.	Deputy General Manager (Fin) [Regional Offices of NHIDCL located in Leh (Ladakh), J&K, North Eastern States, A&N Islands etc.]	05	Pay Matrix Level-12 of 7th CPC [Pre-revised PB-3 of Rs.15,600-39,100/- plus Grade Pay of Rs. 7,600/-]
4.	Manager (T/P) [Regional Offices of NHIDCL located in North Eastern States, A&N Islands etc.]	20	Pay Matrix Level-11 of 7th CPC [Pre-revised Pay Band-3 of Rs.15,600-39,100/- plus Grade Pay of Rs. 6,600/- in CDA Pattern]
5.	Manager (Fin) [Regional Offices of NHIDCL located in Leh (Ladakh), J&K, North Eastern States, A&N Islands etc.]	05	Pay Matrix Level-11 of 7th CPC [Pre-revised Pay Band-3 of Rs.15,600-39,100/- plus Grade Pay of Rs. 6,600/- in CDA Pattern]
6.	Manager (Legal) [NHIDCL HQrs/ Regional Offices of NHIDCL located in Leh (Ladakh), J&K, North Eastern States, A&N Islands etc.]	01	Pay Matrix Level-11 of 7th CPC [Pre-revised Pay Band-3 of Rs.15,600-39,100/- plus Grade Pay of Rs. 6,600/- in CDA Pattern]
7.	Assistant Manager (HR) [NHIDCL HQrs/ Regional Offices of NHIDCL located in Leh (Ladakh), J&K, North Eastern States, A&N Islands etc.]	02	Pay Matrix Level-8 of 7th CPC [Pre-revised Pay Band-2 of Rs.9,300-34,800/- plus Grade Pay of Rs. 4,800/- in CDA Pattern]
8.	Junior Manager (HR) [NHIDCL HQrs/ Regional Offices of NHIDCL located in Leh (Ladakh), J&K, North Eastern States, A&N Islands etc.]	06	Pay Matrix Level-6 of 7th CPC [Pre-revised Pay Band-2 of Rs.9,300-34,800/- plus Grade Pay of Rs. 4,200/- in CDA Pattern]
9.	Junior Manager (Legal) [NHIDCL HQrs/ Regional Offices of NHIDCL located in Leh (Ladakh), J&K, North Eastern States, A&N Islands etc.]	01	Pay Matrix Level-6 of 7th CPC [Pre-revised Pay Band-2 of Rs.9,300-34,800/- plus Grade Pay of Rs. 4,200/- in CDA Pattern]
10.	Junior Manager (Rajbhasha) [HQrs, NHIDCL]	01	Pay Matrix Level-6 of 7th CPC [Pre-revised Pay Band-2 of Rs.9,300-34,800/- plus Grade Pay of Rs. 4,200/- in CDA Pattern]

* Iba den bendenloksema, tarutsü nung NHIDCL nung ano vacancy adokra aser agüja aliba adoktsütsü atema NHIDCL-i teshimtet Candidate tem indang Panel ka shimsü temsüa lir. Nüngdakbatem nung asadanga item Post nung vacancy tem melenshitsu akok.

** Vacancy atema Panel renemtsü mechi tarutsü nung nüngdak adoktsü akok.

Application bendentsü atema anogo : 31.05.2021 (Hombar) 18.00 hrs tashi mapang latettsü, saka 30.06.2021 (Bodhbar) 18.00 hrs tashi atsülangtsüoogo.

Terms and Condition atema - www.nhidcl.com nung tongtepratepang.

TEMETETTSÜ 1 : Central Government Ministries/Departments, Army, Navy, Airforce, Autonomous Bodies, Public Sector Undertakings, State Government Departments aser State Government Public Undertakings nung teinyakdak alir Officer aser agüja aliba criteria nung temsüa alirtemi Deputation basis nung metetdakja aliba proforma den tesüiba küm pungo atema ACRs/APARs indang copy, No Objection Certificate (NOC) aser Vigilance Clearance (VC) agütsür sülen iba Post atema apply asütsü akok. Deputation basis nung appointment atema apply asürtem arishi küm tatakzük kecha mali. Parnok pei pei mapa nungi anener sülen, party anapronglai molungra, contract basis nung parnoki NHIDCL nung maneni inyaksü asoshi melatsü. Parnok tentet ajanga retirement inyakyim atema tanaben parnok nübu nüngdaka jaokra, parnok nem hotpa ka tashi melatsü. Iba sülen, Contract employees atema terms and condition nung agüja aliba nung anidaka parnoki ano maneni contract basis nung inyaksü akok.

TEMETETTSÜ 2 : Iba Vacancy Circular nung temelenshi mesüra inyakyim kar danga lira NHIDCL Website ajanga metetdaksütsü.

TEMETETTSÜ 3 : Application nung nüngdakbatem mabensaba mesüra agüja aliba anogo süir sülen agütsüba application tem magizütsü.

Dy. General Manager (HR)

BUILDING INFRASTRUCTURE, BUILDING THE NATION

Kajal Aggarwal-i Sujoy Ghosh den longjemtsü



Mumbai, Aami June 05, 2021 (Agencies): Sujoy Ghosh-i yanglutsü aliba drama - "Uma" atema actress Kajal Aggarwal nem shilem ka lemezütsüoogo. Taruba Hindi film ya Avishek Ghosh (AVMA Media) aser Mantraraj Paliwal (Miraj Group) longjemer produce asütsü sentong lir.

Kasa mapang, director maparen nung ajemoka, Tathagata Singha lenisüba kübok iba project yanglutsü. Iba project atema film yanglurtemi tanga cast tenüngtem yakta sangdongtsü.

Aggarwal-i blockbuster film talisa "Singham", "Magadheera" aser "Mersal" nung shilem agiba ajaki nguogo aser "Uma" drama nunga lai shilem agitsü tejangraba lemsatepogo.

"Actor ka ama trrepranger saksalemdaktsütsü/atsüa arutsü aser iba den külemi tayongzükba jenti aliba script tajung nung teti shilem agitsü molunga dang lir.

'Uma' nung adentsü maongka anguba nenok den pelashishia lemsateper. Otsü tajung ka nung AVMA Media, Avishek aser director Tathagata nunger den

longjemer inyaksü yongyar," ta arishi küm 35 Kajal-i ashi.

Kasa osang ya Kajal-i Instagram stories' nung lemsatepogo. Lai, film aser trade analyst Taran Adarsh indang tweet ka - "FILM ANNOUNCEMENT: KAJAL AGGARWAL IN & AS #UMA... #KajalAggarwal-i #Uma nung tongti shilem agitsü lemezütsüoogo.... ad filmmaker Tathagata Singha-i Direct asütsü aser Avishek Ghosh deb Mantraraj Paliwal [#Miraj Group] longjemer iba Project yanglutsü...Iba film atema tanüngba cast tenüngtem yakta sangdongtsü," ta lemsatepa liasü.

Taküm küm tom ka nungi tatem tashi nung "Uma" film tangoktsü sentong lir. Iba den külemi, iba project nung adener ajak COVID-19 protocol nung anidaka maparen inyaksü, ta film producer temi ashi.

Aggarwal, shibai Tamil, Telugu aser Hindi film industry nung tongti shilem agia lir, lai Disney+ Hotstar series "Live Telecast" nung tesüsa shilem agiba nguogo.

June 9 nungi 'Pakistan Super League 2021' tenzükshitsü

Karachi, Aami/June 05, 2021 (Agencies): Pakistan Super League 6 indang tanungba match tem Abu Dhabi nung June 9 nungi 24, 2021 tashi asayatsü, ta Pakistan Cricket Board (PCB) ajanga osang jangjatsüogo.

June 25, 2021 nü Pakistan tebur Cricket team pur UAE yimtiba nungi Manchester-i maodang, parnoki tanungba PSL match ajak tembanga asayatsü.

Preliminary round asayaba mapang, six double-header nungi pungo asayatsü aser Qualifier o Eliminator 1 match asayaba mapang June 21, 2021 nü trokbuba double header asayatsü.

Item asaya 1700 UAE time (1800 PKT time) aser 2200 UAE time (2300 PKT time)

nungi tenzüksü. Ano külen, single-header asaya ajak 2000 UAE time (2100 PKT time) nungi tenzükä asayatsü.

June 9 nü, pezübuba jenjang nung alir Lahore Qalandars-i tasembuba jenjang nung alir Islamabad United den asayatsü, koba asayamung indang asaya 15buba alitsü.

United aser Qalandars team anaprongla Bodhbar nikongdang nungi training agi tenzükä liasü; aser tanungba team pezü tashi Brehostibar nungi training tenzükogo.

Asayartem aser support staff, shirnok anogo 7 tashi latettsüba room isolation' tembanga aser negative test osang aruogo, parnoki külem team pur rongnung adentsü aser training agitsü melaogo.

Iba asayamung ajanga asayartem, commercial partners aser franchise tem akok tashi ajangzükdaksütsü asoshi, PCB-i England and Wales Cricket Board (ECB) den jembiteper sülen, Pakistan tebur Cricket asayartem aser support staff tem reenmba ama masü, saka June 25, 2021 anogo nungang Abu Dhabi nungi ayamesotsü bangjemtepogo.

Iba League temer sülen, Pakistan cricket team pur Manchester-i aotsü aser iba tesem nungi room isolation period aser training session atema parnok Derby nung amungtsü. Iba sülen, July 06, 2021 nü Cardiff-i aotsü aser July 08 nü mezüing One-Day International asayatsü sentong lir.

Wimbledon nung Wawrinka masayatsü



New Delhi, Aami/June 05, 2021 (Agencies): Asemben Grand Slam takok angusang, Stan Wawrinka tetsüing yirur aliba ajanga aruya aliba Wimbledon nungi pa tukuogo. Kasa timtem ajanga tang tasayadak aliba French Open asayamung nunga pai shilem magitet, ta (ATP) sangdong ka ajanga metetdaksü.

Taoba mapang, World no. 3

Wawrinka, taküm küm tetenzüklen pa tetsüing abilen operation agi. Arishi küm 36 tain Swiss nunger Wawrinka, March ita Qatar Open asayamung mezüing round nung Lloyd Harris-i tsükdaksüba sülen, pai ATP Tour nung asayadanga mali.

Wimbledon asayamung ya June 28, 2021 nungi tenzükä asayatsü terenemba lir.

Wawrinka-i All England Club nung asayamung 15 tashi nung toktepa aruogo, kong 2014 aser 2015 küm pai quarter-final tashi tongteta asayaogo.

French Open (2015) aser U.S. Open (2016) title makokdang, 2014 küm Wawrinka-i Australian Open takok angu.

Tang world no. 24 Wawrinka ya rehabilitation atema Monaco nung lir. Taoba ita Wawrinka otongdar kati ashiba agi, pa temang tajungba kümra grasscourt season nung shilem agitsü imlar.

North-Eastern Region aser kidanger linüktem den international arrtsü aliba tesemtem nung National Highway tuluba, tajungba yanglutsü aser maparen kara aotsü atema Ministry of Road Transport & Highways kübok Government of India ajanga National Highways & Infrastructure Development Corporation Limited tenzüksüogo.

India team anogo asem tashi shinga den majuruteptsü

Southampton, Aami/June 05, 2021 (Agencies): New Zealand team den World Test Championship final asayatsü lia, Aegeas Bowl nung team tem training agitsü asoshi temelaba magütsüdang team nung züingsem ajak anogo asem tashi hard quarantine asütsü, ta India nunger spin bowler Axar Patel-i metetdaksü.

Ajaki yongya ataba World Test Championship final ya Southampton nung June 18 nungi tenzükä asayatsü aser India team Bodhbarnü tonga aruba sülen, iba asayamung atema renemshitsü asoshi parnok mapang tatakzük dang

angutsü.

Ano külen, New Zealand team pur Test series ana atema England team den tasayadak lir.

Iba tour atema England-i marudang, Mumbai nung India squad anogo 14 atema quarantine nung liasü aser Southampton tongli dang parnok mapang tatsüka atema quarantine asütsü.

"Iba tesem tonga arur sülen, ayipjanga mejangogo aser onok ajak quarantine' asütsü sentong lir. Taruba anogo asem tashi onok shinga dena (asayar tsüingda) majuruteptsü asoshi metetdaksüogo. Ajiasünung, item anogo tsüingda onok ajak

pei pei takdang nung quarantine' asütsü," ta Axar Patel-i lemsatep.

India tetsür aser tebur Cricket team anaprongla tayimtsü ka nung England tonga aruogo.

Team anaprongla London atongba sülen, parnok ajak Southampton-i aotsü atema bus nung ghonda ana tashi senzü.

Maneni, WTC final asayar sülen, India tebur team-i England team den Tests series asaya tenzüksü. Ano külen, India tetsür team-a June 16, 2021 nungi tenzükä England tetsür team den Test ka, ODIs asem aser T20 International asayatsü terenemba lir.

Euro 2020 atema asaya anogotem sangdongogo

New Delhi, Aami/June 05, 2021 (Agencies): Europe nungi linük 24

densema Euro 2020 takok marok atema tokteptsü terenemba lir. Iba asayamung ya Europe kübok yimti 12 tashi nung lemsar ayongzüksü aser final den semifinal match London kübok Wembley Stadium nung asayatsü, koba Euro

asayamung putiotsü nung mezüing alitsü.

Team 24 ya group trok nung lemsar lir, kong group shia nung team pezüzü dena lir. Group ajak nungi temaba team ana aser tasembuba jenjang tongteter team pezü tashi Round of 16 atema qualify asütsü.

* **Euro 2020 asaya telemsa yamai alitsü:** (Asaya mapang ajak IST alitsü):

GROUPSTAGE:

- June 12, Saturday

Group A : Turkey vs Italy (12:30 am, Rome)
Group A : Wales vs Switzerland (6:30 pm, Baku)
Group B : Denmark vs Finland (9:30 pm, Copenhagen)

- June 13, Sunday

Group B : Belgium vs Russia (12:30 am, St Petersburg)
Group D : England vs Croatia (6:30 pm, London)
Group C : Austria vs North Macedonia (9:30 pm, Bucharest)

- June 14, Monday

Group C : Netherlands vs Ukraine (12:30 am, Amsterdam)
Group D : Scotland vs Czech Republic (6:30 pm, Glasgow)
Group E : Poland vs Slovakia (9:30 pm, St Petersburg)

- June 15, Tuesday

Group E : Spain vs Sweden (12:30 am, Seville)
Group F : Hungary vs Portugal (9:30 pm, Budapest)

- June 16, Wednesday

Group F : France vs Germany (12:30 am, Munich)
Group B : Finland vs Russia (6:30 pm, St Petersburg)
Group A : Turkey vs Wales (9:30 pm, Baku)

- June 17, Thursday

Group A : Italy vs Switzerland (12:30 am, Rome)
Group C : Ukraine vs North Macedonia (6:30 pm, Bucharest)
Group B : Denmark vs Belgium (9:30 pm, Copenhagen)

- June 18, Friday

Group C : Netherlands vs Austria (12:30 am, Amsterdam)
Group E : Sweden vs Slovakia (6:30 pm, St Petersburg)
Group D : Croatia vs Czech Republic (9:30 pm, Glasgow)

- June 19, Saturday

Group D : England vs Scotland (12:30 am, London)
Group F : Hungary vs France (6:30 am, Budapest)
Group F : Portugal vs Germany (9:30 am, Munich)

- June 20, Sunday

Group E : Spain vs Poland (12:30 am, Seville)
Group A : Italy vs Wales (9:30 pm, Rome)
Group A : Switzerland vs Turkey (9:30 pm, Baku)

- June 21, Monday

Group C : North Macedonia vs Netherlands (9:30 pm, Amsterdam)
Group C : Ukraine vs Austria (9:30 pm, Bucharest)

- June 22, Tuesday

Group B : Russia vs Denmark (12:30 am, Copenhagen)
Group B : Finland vs Belgium (12:30 am, St Petersburg)

- June 23, Wednesday

Group D : Czech Republic vs England (12:30 am, London)
Group D : Croatia vs Scotland (12:30 am, Glasgow)
Group E : Slovakia vs Spain (9:30 pm, Seville)
Group E : Sweden vs Poland (9:30 pm, St Petersburg)

- June 24, Thursday

Group F : Germany vs Hungary (12:30 am, Munich)
Group F : Portugal v France (12:30 am, Budapest)

* ROUND OF 16 :

- **June 26, Saturday** : 2A vs 2B (9:30 pm, Amsterdam)
- **June 27, Sunday** : 1A vs 2C (12:30 am, London)
1C vs 3D/E/F (9:30 pm, Budapest)
- **June 28, Monday** : 1B vs 3A/D/E/F (12:30 am, Seville)
2D vs 2E (21:30 pm, Copenhagen)
- **June 29, Tuesday** : 1F vs 3A/B/C (12:30 am, Bucharest)
1D vs 2F (21:30 pm, London)
- **June 30, Wednesday** : 1E vs 3A/B/C/D (12:30 am, Glasgow)

* QUARTERFINALS :

- July 2, Friday

QF1 : Winner 6 vs Winner 5 (9:30 pm, St Petersburg)

- July 3, Saturday

QF2: Winner 4 vs Winner 2 (12:30 am, Munich)
QF3: Winner 3 vs Winner 1 (21:30 pm, Baku)

- July 4, Sunday

QF4: Winner 8 vs Winner 7 (12:30 am, Rome)

* SEMIFINALS :

- July 7, Wednesday

SF1: Winner QF2 vs Winner QF1 (12:30 am, London)

- July 8, Thursday

SF2: Winner QF4 vs Winner QF3 (12:30 am, London)

* Final : - July 12, Monday (IST)

Winner SF1 vs Winner SF2 (12:30 am, London)

BILEMDANGANG

"Ken o ka nung ochi ana malir."